



Laschar enavos sdrimas betg segadas sin las surfatschas cultivadas per promover la diversidad ecologica. La Pro Natura ha lantschà ina concorrenza ed undrescha las pli bellas sdrimas. FOTO PRO NATURA GRISCHUN

Cultivar agreabel per ils insects

Laschar enavos sdrimas betg segadas è ina da bleras pussaivladads da l'agricultura per promover la biodiversidad. La Pro Natura Grischun vul far attent a la valor da las sdrimas da retirada per insects e ha lantschà ina concorrenza

ANDREAS CADONAU/FMR

Per il solit vai svelt. Grazia a las maschinas modernas pon ils purs segar e fanar en curt temp grondas surfatschas. Quai ch'è bun per l'agricultura è difficultus per la biodiversidad. Enaquella ch'il fain svanescha svelt dal prà mancan a blers insects tuttenina il nutriment ed il spazi da viver. La politica agrara ha instradà in vast instrumentari per promover la biodiversidad. Tranter quellas sa chatta era la pussaivladad da betg segar l'entira surfatscha, mabain laschar enavos sdrimas. Uschènumnadas sdrimas da retirada per insects.

Sdrimas impurtantas

Tar la Pro Natura vegna quellas sdrimas da retirada stimadas per ina da las impurtantas mesiras per promover ils insects sin il prads. E l'organisaziun per la protecziun da la natira ha per quei intent lantschà in concorrenza per inscener las sdrimas da retirada sco quai che la manadra da project, Sarah Hell, scriva en ina comunicaziun. «Puras e purs che lain enavos sdrimas betg segadas promovon la varietad da las spezias a moda essenziala». La Pro Natura Grischun fa attent che la valor dals insects vegnia sutvalitada. «Els sa chattan giudim la stgala da la chadaina da nutriment.» Pli paucs insects munta main nutriment per utschels, peschs ni era utschels-mezmieur scriva l'organisaziun per la protecziun da la natira. «Las sdrimas da

«La gronda part da la populaziun n'enconuscha betg la valor da las sdrimas e manegia ch'è puras e purs lavurian malnet e ch'els na sajan dependents da racoltar l'entir fritg.»

Rolf Hug, manader dal bain puril dal Plantahof

retirada betg segadas protegian ils insects, els chattan là nutriment e pon sa sviluppar.» Enconuschentamain sa sminueschan ils insects a moda dramatica è quai betg sulet en Svizra. In dischequilibrer en la diversidad ecologica e damain insects promova parasits che donnegieschan las plantas cultivadas. E quai la finfinala per dischavantatg da l'agricultura che sto impunder dapli lavur e daners per proteger las plantas cultivadas.

Valan per tartogns

Las sdrimas na betg segadas nun èn fitg darasadas en l'agricultura grischuna ed era betg fitg tschertgadas tar puras e purs. E betg exnum pervia da la lavur supplementara ni damain fritg. Quai conceda era il manader dal bain puril dal Plantahof, Rolf Hug. «La gronda part da la populaziun n'enconuscha betg la valor da las sdrimas e manegia ch'è puras e purs lavurian malnet e ch'els na sajan dependents da racoltar l'entir fritg.» Rolf Hug è anc s'exprimì detg diplomatic. Puras e purs che na segan betg lur parcella dad in chantun a l'auter e allontaneschan mintga singul fain cun il trimmer valan magari per tartogns. Quai tant tar blers collegas da professiun sco era tar ina part da la populaziun. Cumparegliabel cun il possessur dad ina chasa dad ina famiglia che na sega betg ses pastget e lascha crescher fauna e flora. El na chatta betg gronda stima tar ils vischins cun ils segapastgets en acciun mintga sonda.

Sustegn da la politica agrara

Enfin ils 15 da fanadur pon puras e purs sa participar cun lur surfatschas extensivas e mez extensivas a la concorrenza da la Pro Natura che onorescha cun ina premi las pli bellas surfatschas. E la populaziun po sa participar cun fotografias ad ina votaziun online per la sdrima da retirada la pli bella. Ulteriuras informaziuns pon ins retschaiver tar Pro Natura Grischun. La politica agrara enconuscha in detaglià e magari cumplitgà instrumentarium da promover surfatschas ecologicas. Tar quellas appartegnan era parts betg segadas sco ils spazi da retirada per insects. Rolf Hug valitescha la cumpensaziun finanziaria publica per la sdrimas da retirada per modestas. El vesa dentant quellas sdrimas era per in servetsch da l'agricultura vers la societad e las stentas da promover la biodiversidad. Impurtant da sia vart è dad infurmar la populaziun pertge che las sdrimas restan ed ina ni l'autra stgarpa na vegn betg segada ni segada pli tard.



La valor dad insects vegn sutvalitada. Pli paucs insects munta main nutriment per utschels. FOTO MAD